

kontuola...

Antzuolako hamabostekaria. 8 zenbakia, 1997-12-19

Danok Bat elkarteak lokal bila

1960an Don Zesareoren eta orduko gazteen laguntzaz zabaldu zen

Orain dela 37 urte zabaldu zen Danok Bat. Herrian emakumeak sartu zitezkeen elkarte bakarra zen garai haietan eta gaur egun 270 bazkide ditu. Urte guzti hauetan Tellerianeko etxean egon den elkartekoek joan zen domekan beste leku batera joan edo atea itxi behar dituzten erabakitze bilerak izan zuten; hala ere, leku eskaintza bat baino gehiago izan dutenez beste bilerak bat egitekotan dira bazkide guztien artean lekuri proposena topatzeko.



Betiko lokala laga egin beharko dute bazkideek.

Zesareo Gabarainek orduko gazte eta helduen laguntzarekin zabaldu zuen Danok Bat elkarteak berea egin du, Tellerianeko etxean behintzat. Horrela adierazi digu gaur egun elkarteko lehendakaria den Eduardo Juradok. Bere esanetan, "udalak orain dela gutxi estudio bat egin du, eraikuntzaren egoera zein den zehazteko eta, dirudieraz, oso hondatuta dago".

Lokal eskaintzak lau dira dagoeneko: Lazareto etxea (DYA), Kalebarrenen egin berri diren etxeetako beheak eta Kontxaneko denda egon zeneko etxea. Oraintsu, gainera, Isidoraneko bearrua saltzeko dagoela jakin dute.

Elkarteko bazkideek bazekiten noizbait utzi beharko zutela Tellerianeko etxea; hala ere, ez zuten hori helduko zen eguna ikusten. "Ondarreko etxeak egin aurretik, hau guztia botako zutela bagenekien; baina... gure nahia da beste lokal batera joatea; gazteendako elkarte aproposa izaten jarraitzea nahiko genuke, bestela Gaztetxea baino ez baitaude".

Emakumeentzako eta gazteentzako elkarteak

1960ko Santa Zezilia egunean zabaldu zuten Danok Bat elkarteak. Don Zesareo herrian egon zenean, eguraldi txarra zegoenean emakumeek eta gazteek ez zutela non egon, eta kezka horrek eraginda, elkarte bat sortzeko ahalaginetan hasi zen. Agustin Telleriarekin akordio batera iritsi eta oraingo elkartearen bigarren pisua zabaldu zuten;

1961ean, berriz, taberna jarri zioten. Orduan elkarteko juntan aritu zirenek diotenez, "geuk konpondu genuen lokala; margotu egin genuen, eta diru barik telebista bat ekarri genuen; herrian zegoen bakarrenetakoa zen eta antzuolar asko egin zen bazkide; 10 PTA sartzeagatik eta 35 giltzagatik".

Emakumeak sar zitezkeen lehenengo elkarteak izan zen eta saskibaloi eta atletismo ekipoak ere izan zituen; sariak oraindik bitrinan daude.

Gazteendako elkarte apropos bat izaten jarraitzea nahiko genuke

Olentzeroren sariak eta pailazoak

Abenduaren 26an, eguakitzean, 16:30etan hasita hainbat ekitaldi egingo dira Gaztetxokoan. Hasteko "Bixkor, Koxkor eta Enpresari jauna" pailazoak izango dira eta ondoren Olentzeroren karten sarietako 1. eta 2. mailako sariak banatuko dituzte. Sarien ostean gaztetxoko txokolate beroa banatuko dute eta adierazi digutenez, "oparixoren bat ere banatuko dugu umeen artean". Gaztetxokoa, 26tik urte amaiera arte egunero egongo da zabalik, urtarrilean, berriz, 1etik 6ra itxita egongo da.

Gazinema

Gaur eguakitzatza, abenduak 19, "La Roca" filmea eskainiko du Gazinemak 22:00etan. Domekan, abenduak 21, "101 Dalmatas" 16:30etan. "Space Jam" izango da abenduaren 26an, 22:00etan eta domekan, abenduak 28, "La dama y el vagabundo" eskainiko dute. Datorren urteko lehenengo filmeak ere jaso nahi izan ditugu zuen jakinmina asetzeko. Urtarrilaren 2an, 22:00etan, "Ramson" edo *erreskatea*; urtarrilaren 4an, 16:30etan "Pinocho, la leyenda".

Gaztetxean larru gorritan

Bergarako Jam aretoan, jostunen eguna ospatzeko, abenduaren 12an antolatu zuten strip-tease saioaren arrakasta ikusita, Gaztetxekoek antzerako zerbait egitea pentsatu dute. "Datorren asteko zapatuak, gauerdarako, striptisa antolatu dugu". Ordu horretan, gaueko 12etan, itzaliko dira Gaztetxeko argiak eta orduan hasiko da showa. Ikusgarria behintzat izango da, beraz, inoiz horrelakorik ikusi ez dutenek, aukera ederra daukate datorren asteko zapatuan. Aukerak merezi du!


Binakako pilota txapelketaren finala

Bihar bertan, abenduak 20, jokatuko dira herriko pilota txapelketaren azken partiduak. Finalean Juan Migel Pagaldai eta Jose Mari Galeano, aurreko urteko irabazleak, arituko dira Jose Mari Mendizabal eta Jose Ramon Jauregi-
ren aurka. 17:30etan hasiko da erronka, baina aurretik, eta Valentin Zabalok esan digunez, "mutikoez jokatu ditzuten partidu batzuk, giroa berotzeko". Lehenengoa Iñaki Agirrek eta Aitor Mendizabalek jokatu dute Xabin Muruamendi-
diaraz eta Eneko Mujikaren aurka, eta ondoren Iñaki Agirrek eta Mikel Idiakenez, Andoitz Peña eta Endika Iturberen aurka.

Hasiera batean, txapelketako 3. eta 4. postuak ere egun horretan jokatuko ziren, baina "batzuk eskuak eta beste batzuk hankak gaizki dauzkatela eta, ez dira bi postu horiek jokatu" esan digu Valentinek.

Euskal ohituren inguruko diapositibak

Patxi Saizek abenduan bi diapositiba saio eskainiko ditu zine aretoan. Neguko soltizioa Euskal Herrian abenduaren 22an, eta Euskal Herriko mitoak abenduaren 30ean. Bi saioak 19:30etan izango dira.



Patxi Saiz Antzuolan

Urtarrilaren 3an, zapatuan, 18:30etan kontzertu berezia izango da Antzuolan. Patxi Saizek bere azken diskoa aurkeztuko digu. Berarekin jardungo dute diskoan parte hartu duten Xabier Agirre eta Alaitz Zabalo antzuolarrak eta Eneke Txurruak eta Arantzazu Saizek. Idolazek antolatutako kontzertuan Patxiaren taldeaz gain, Imuntzo trikitilaria eta Antzuolako abesbatza arituko dira. Fernando Letek adierazi digunez, "herriko abesbatzak kantu batzuk estreinatuko ditu".

leapaindegia
Aureli Cot Velasco
Cot
Gabon zoriontsuak eta urte berri on!
Edertze aretoa
Errekalde, 2
ANTZUOLA
Tf. 78 71 37

ANTZUOLA
Apainketak eta isolamenduak
Pladurezko dibisioak
Kalegoi, 21 ANTZUOLA
Tf. 72 30 05
Bildegia 78 70 40

LEKU-BERRI MERENDEROA
Janariak eta edariak
Tf. 76 60 94

Arrolarekin Arrolara

**Antzuolarron
Independentzia Eguna**

Urtarrilaren 10ean ospatuko da, azkenean, "Antzuolarron Independentzia Eguna" Gaztetxeak, Kalebarrengo Jai Batzordeak eta Idolazek antolatuta. Txistularien kalejirarekin hasiko da jaieguna, eta ondoren herri-poteoa, txaranga eta herri bazkaria izango dira. Eguerdiko ordu biak eta erdietan, herri-bazkaria egingo da pilotalekuan. Jarriko diren berogailuetaz gain, bertsolariak, trikitilariak eta dantzariak egongo dira giroa gehiago berotzeko.

Bazkal ostean partehartzaileek kantuan egiteko letrak banatuko dituzte antolatzaileek.



Arrola gainera igotzen dira Arrolakoak urte hasieran.

1997ko azkenengo mendi irteera egingo du Arrolak Aizkorrira aurtengo azkenengo egunean. Urbia gainera gailurrera igotzeko izen-ematea datorren astelehenean, abenduaren 29an, izango da 19:00etatik aurrera Arrolako lokalean. Ohitura bihurtu den irteera honekin amaitzen dute urtea, baina berehala emango diote hasiera hurrengoari. Urta-

rrilaren batean, Arrola gainera igoko dira, eta salda beroa eta txistorra jateko aukera izango dute bertan. Irteera 09:00etan izango da herriko plazan.


Bestalde, urtarrilaren 4an, domekan, Anoetara joango dira Arrolakoak herriko gazteekin. Goizean Oriotik Igeldora oinez, eta arratsaldean Errealak Betisekin duen partidura joango dira.

Zuzenketa

Aurreko Kontuolan esan genuen hiri gutuna Mila Eizmendik, Eusko Jaurlaritzako teknikariak, euskaratu zuela, baina argitu beharra dugulan hau bere kabuz egin duela eta ez teknikari mailan.

GURE ARTIAN

Gabonak gogoz ala ohituragatik ospatzen dituzu?



**Jose
Losada**

Fartsa bat dira eta ez ditut zelebratzen. Dirua alferrik botatzen da, kontsumismo hutsa dira. Gainera, jende guztiak dena barkatzen du eta hori engainu bat da.



**Miren
Zubillaga**

Bai, ospatzen ditudu baiña tradiziño batekin betetzen dot. Gaiñera etxat gustatzen zelebratzia, tristuria emoten doste, deprimidu egitten naiz eta ez takit zergaittik.



**Kontxi
Mendizabal**

Txiki-txikittatik holaxe ohitu galako zelebratzen ditudugu, tradiziño batekin betetzen dot. Gehixegi be etxat gustatzen baiña Gabonak diela eta zelebrau egin bihar die.

GOROSTI
Taberna

☎ 76 62 96

Zurrategi plaza ANTZUOLA

igok eta Txomin

Pintura orokorrean.

*Paper, tela, binilo, kortxo... estalduak.
Gotelesa, iztukuak eta bestelako imitazioak.*

ANTZUOLA
☎ 76 60 39

BERGARA
☎ 76 19 98

LARREA

TABERNA

**Kalebarren, 17
ANTZUOLA**

Natibittate, ase eta bete

“Guk eukitzen giñuan poza! intxaur-saltsia, Kontxaneko kokodrilua, nazimentua, erregien erregalua...” Abenduan murgildurik gaudenez, batek baino gehiagok ekarriko ditu oroimenera Gabonak izaten zirena. Horretaz aritu gara Angeles, Ines eta Martinarekin eta eurei entzunaz, fetxa horiek suposatzen zutena jakin nahi izan dugu.



G abon egunean, gabon kantak abesten irtengo dira umeak.

“Geu be irtetzen giñan” dio Angelesekin, “nazimentua egitten giñuan ardirixekin, pastoriakin eta figura danekin; odolxixari iriña botatzen gontsan edurra egitteko; gero nazimentua andan ipintzen zan eta auzuan irtetzen giñan panderua juaz eta kantuan”.

“Bai nazimentua –dio Martinak– zeukanak bakarrik, ze etzeukana poltsiakin irtetzen zan, eta zeukanari begira inbidixaz egoten giñan. Baiña kantuan danok egitten giñuan, Gabon gabonseta, erroa larroseta, Jesus jaio da ta, jo degun krisketa; Belengo portalian ate zabaletan, hotzak ikaraz dago, Jesus lastuetan...”

Gabonetako jakiak bereziak izaten al ziren?

“Orduan guk eukitzen giñuan poza” dio Angelesekin. “Gabon gabian, olixo-azia eta bakallaua edo bixigua jaten giñuan –dio Martinak– eta postrerako intxaur saltsia eta pikuekin eta okan pasekin egindako konpotia; hurrengo egunian, Natibittate, ase eta bete esan eta berriz jatera; guriña be egitten zan, baiña gu turroia etaratzeko desiatzen egoten giñan. Gabonetan dana gertu eukitzen zan, garrafoi ardaa gizonendako eta gabon subilla beheko sua ederragua izeteko; gaiñera gero errondara jun bihar zan”.

Errondara? Zer da hori ?

“Nun egingo juau errondia? gaur halako etxetan egingo juau” –Martinak– “kartetan egitten zan; zazpi tta erdixan, briskan, punttuan; Gabon Zaharrak arte segi egitten zan. “Jai bezela izeten zan denbora dana, –Ines– San Esteban eguna be zelebratzen giñuan”.

“Bai, eta gero lastazauak hartu eta mezetara juten zan –Martinak–. Edarrak jungo zien mutillak 6etarako mezetara!”.

Mutilak goizeko 6etan joaten omen ziren mezetara, baina eurak 10etan joaten ziren elizara; “Natibittate goizian, bat jaikitzen zan eta txokolatia egitten zeban bestiei ohera eruateko”.

San Esteban eguna abenduaren 26a ospatzen zenutela esan duzue?

“Bai... orduan bai... San Esteban txe, lehen letxe “ dio Martinak. “Erromerixia egoten zan eta gramolia ipintzen zan plazan” –Angelesekin–. “Bai, baiña aramaittakuakin etxera e!–Martinak–, azkenengo kanpaiakin erretiratzen giñan”.

Kontxaneko mazapoia ere zuen garaikoa omen da, ezta?

“Haura zan kokodrilu edarra; eska-paratian eukitzen zeban urtero, zatika saltzeko; gabonsarixak pe egoten zien bezeruentzako, menbrillua, galletak...”.

Olentzero ez baina Erregeak etortzen omen ziren Antzuolara?

“Zeiñek baiño zein brillo hobiau-kin ipintzen giñutzen zapata paria bentanan, kanpotik –Martina– naranjak edo mazapoiak ekartzen zoskuen”; “batzutan dirua be bai –Angeles– baiña gero esaten zoskuen «bueno oin gorde egingo dogu gero zeozer erosteko» eta atzera kendu egitten zoskuen”.

■ ■ ■
 “Natibittate goizian bat jaikitzen zan eta txokolatia egitten zeban bestiendako”
 ■ ■ ■



Orain dela 65 bat urteko Gabonei buruz aritu ginen Santionekuekin.



**MUEBLES
 IGEA**

Zurrategi plaza, 4 behea ANTZUOLA Tf. eta faxa 78 71 80

Sukalderako eta bainurako altzariak
 Altzari rustikoetan
 espezializatuak